

問于 中朝一款議于他大臣則左議政李恒福以為昨於經筵畢陳愚見行判中樞沈喜壽以為譯官之探問於吏胥何能知大官之意而決其可否也徒索重賂而終以謊說答之將何所憑信然此則猶或可試至於使臣呈文則雖善辭搆送事躰非便無所可據安有莫重莫大之事國書不達而使臣私干者乎反覆商量未得善策大臣之議如此敢啓答曰顯親之情自不能已 聖皇明照萬里必有所降監古人為親受污辱之名假令請之不得庸何傷乎願惟呈文先試事勢不便以四月初生改擇日直為發送○以李好信為大司諫崔東式為輔德任碩岭掌樂正鄭廣成司諫李湏獻納金正男副校理韓汝潏持平權昕修撰朴弘道正言李燭禮曹佐郎洪濤文學鄭光績潭陽府使○甲寅兩司合啓李懿信及交河事答曰已諭李懿信有何可罪之事勿為煩論○乙卯合啓李懿信等事答曰李懿信有何可罪之事交河事相觀形勢更為議處實合事體徑先瀆擾繫君上手足果安於心乎○夜一更赤氣大一二圍長三四丈狀如火炬列立北斗下者三南方者二東方巽方者各一良



久乃減○丙辰黃海監司柳慶宗拜辭王引見曰本道人心極  
惡逆變屢起譏察撫綏之方善為思量慶宗對曰譏察則當留  
意而撫綏則必有實惠民可得安奉使之臣所當極力盡心而  
必有蠲減之事惠澤及下矣○丁巳兩司合啓李懿信及交河  
事答曰不可從也休煩可矣○以鄭曄為行都承旨李惺副提  
學鄭廣成執義金止男掌令朴鼎吉文學鄭百昌檢閱○戊午  
冬至使趙存性李成吉等還自京師齋皇勅王出迎于慕  
華館○咸鏡北道兵使李時言狀啓曰胡人進告奴酋率軍兵  
進圍忽刺溫部城以雲梯陷之忽酋脫身北走忽溫老土皆豆  
滿江外女真也二部吞併諸部為六鎮大梗及老酋起於建州  
吞併二部收其兵甲始強大有窺遼左之志矣○政院啓曰回  
還冬至使等不捧辨誣回咨以來其朦朧不察之失大矣請推  
考王從之先是中朝指我國與倭交好仍於冬至使並陳辨  
其誣枉而使臣不捧回答故有此啓